



TEZAUUR LITURGIC
19 DECEMBRIE

SLUJBA
SF. CUVIOS
ILIE
MUROMETŢ
DE LA
PECERSKA



MOSCOVA, 2000



Служба прп. Илие Муромцу

На Господи воззвах -стихир 8, глас 4:

Из глубины воззвах к Тебе, Господи:
Аще не бы Господь был в нас -
Глаголет боговдохновенный пророк -
Совратилися бы вкупе пути истинна,
Сего ради некогда младей о вере Руси
Яко от небес посылаются Промыслом
Доблестию духа изрядствующи подвижники
От нихже единого сподоби, Спасе, возславити
Приснодарствуяй тому во бранех победу./

Да будут уши Твои:
От предел древля славою Мурома/
Подвижник долготерпения является -/
Илия Божественный воистину жребий,/
На служение избран изрядное,/
Да подаст христолюбиву воинству крепость//
Несокрушимо мужество и на враги победу./

Аще беззакония назиши, Господи:
Яко раб благоговеин Господу, князю же опора,/
Собратии мудрый стратиг,
народу заступник милостивый/
Показался еси, Илие, о поборниче правды,/
Яко новое солнце, добродетельми сияяй всем,/

Супостаты убо пожигаяй яростию //
Ходатайствуя от небес на тех победу./
Имене ради Твоего:
Во дворех князя благоверна/
Среде обстояния отвсюду поганых полков/
Мир со благоденствием учиняются,/
Яко чудну Илии со ратники его/
Самоотвержения крестным оружием//
Присноявляти верным на враги победу./
От стражи утренния:
Неколебима держава Русская,/
Во время оно преславна показуется,/
На недвижимем утверждена камени веры,/
Благодарение непрестанно
возглашает Господу,/
Тобою, Илие, ограждена от дальних предел,//
С Константином Крест возносит,
яко сим победа./
Яко у Господа милость:
Не могий нигде покоя обрести,
Ни удовлетися, ниже радоватися,
Враг исконный поганых копием
Рану ти сердечную наносит, чудне Илие,
Не могий коснутися в тебе
веры живыя глубины,
Приближая ти исходну духа победу.
Хвалите Господа вси языцы:
Ново поприще, обаче кратковременно,

Отверзается ти, смиреннейше Илие:
Сего бо сердцем ураненным возжелел еси,
Еже воинству приобщитися Духа бойцов
Сиречь полку иноческу,
преподобными отцы ведомо,
Яснозрящими Христову надмирну победу.

Яко утвердися милость Его на нас:
По имени и житие твое, Илие достохвальне,
Се воистину, яко крепость Господня,
показался еси о всех:
Юностию, терпеливодушною верою
утвержденною,
Еще зрелостию,
бранными увенчанною подвиги,
Паки мирным исходом к премирным
Божия инока,
Се земная слава твоя, се небесна победа.

Слава, глас 2, самогласен, подобен "Егда от
древа":

Се во веки память твоя, святе Илие:
Яко народу любезен ти образ
славным сказанием,
Яко и шары печатлеется добрая сила твоя,
Яко и перву аероплану русскому
твоим именем нарицатися.
И от древних благодарною осиян любовью,
Се - и ново христолюбиво воинство
молитвою укрепляеши,

Пастырская служения тому о вдохновителю,
О пренадежное державы ограждение,
Благослови победами новыя чудо-богатыри.
И ныне, глас б: Вертепе, благоукрасися...

Вход и прокимен дне:

Судей Израилевых чтение:

Прииде Ангел Господень, и седе под дубом, иже
есть во Ефрафе, иже бысть Иоаса отца Езри. И
Гедеон сын его млачаше пшеницу на гумне его,
бежати от лица Мадиамля. И явися ему Ангел
Господень и рече къ нему: Господь с тобою,
сильный крепостию. И рече к нему Гедеон: во
мне, господи мой: и аще есть Господь с нами, и
вскую обретоша ны вся злая сия? и где суть вся
чудеса Его, елика поведаша нам отцы наши,
глаголюще: не из Египта ли изведе нас Господь?
И ныне отверже нас Господь и предаде нас в
руку Мадиамлю. И возре на него Ангел
Господень и рече ему: иди в крепости твоей сей,
и спасеши Израиля от руки Мадиамли: и се,
послах тя. И рече к нему Гедеон: во мне,
господи, въ чесом спасу Израиля? Се, тысяща
моя хуждша въ Манассии, и аз есмь мний в
дому отца моего.
И рече к нему Господь: понеже аз буду съ тобою,
и избиеши Мадиама, яко мужа единого.

И рече к нему Гедеон: и аще обретохъ благодать пред очима твоима, и да сотвориши мне днесъ знамение, яко ты глаголеши со мною: не отиди отсюда, дондеже прийти мне къ тебе, и принесу жертву мою, и пожру предъ тобою. И рече: аз есмь, премедлю, дондеже обратишия ты. И Гедеон вниде, и сотвори козлище от коз, и четверть ифи муки опресноков, и мяса вложи в кошницу, и юху вляя в горнец: и изнесе к нему под дуб, и поклонися. И рече к нему Ангел Господень: возми мяса и хлеба пресныя, и положи у камене онаго, и юху близ излий. И сотвори такo.
И простре Ангел Господень конец жезла, иже в руке его, и прикоснуса мясом и хлебомъ пресным: и возгореса огонь из камене, и пояде мяса и опресноки: и Ангел Господень отиде от очей его. И виде Гедеон, яко Ангел есть Господень, и рече Гедеон: увы мне, Господи, Господи, яко видех Ангела Господня лицом к лицу.

Судей Израилевых чтение.

Пойде Сампсон, и ят триста лисиц, и взя свечи, и связа ошиб ко ошибу, и устрои едину свещу между двема ошибома: и разжже огонь в свещах, и пусти я в нивы филистимски: и запали нивы от гумен и даже до класов простых и до

винограда и масличия. И рекоша иноплеменницы: кто сотвори сия? И рекоша: Сампсон зять Фамнафеев, яко взя жену его и даде ю единому от друзей его. И въздоша иноплеменницы и сожгоша ю и дом отца ея огнем. И рече им Сампсон: аще и сотвористе вы тако ей, аз не благоизволю, но отмщение мое единому комуждо вас сотворю, и посемъ почию. И порази их голени до бедр язвою велиею: и сниде, и вселися у водотечи в пещере камене итама. И изыдоша филистимляне, и ополчишася во Иуде, и разсеяшася в леги. И рече им всяк муж Иудин: почто приидосте на ны? И рекоша иноплеменницы: связати Сампсона приидохом и сотворити ему, якоже сотвори нам. И снидоша три тысящи мужей от Иуды к пещере камене Итама и рекоша к Сампсону: не веси ли, яко владеют нами филистимляне? и вскую сия сотворил еси нам? И рече им Сампсон: якоже ми сотвориша, тако сотворих им. И рекоша ему: связати тебе приидохомъ и предати тя в руке иноплеменником. И рече им Сампсон: кленитесь мне, да не убиете мене вы. И рекоша ему, глаголюще: ни, но токмо соузом свяжем тя и предадим тя в руки их, смертию же не умертвим тебе. И связаша его двема ужы новыми и изведоша его от камене того. И той прииде до челюсти: иноплеменницы же воскликнуша и

текоша противу ему. И сниде на него Дух Господень, и быша узя на мышцахъ его яко изгребие, егда зажжется огнем: и разрешишася узы его от руку его: и обрете челюсть ослею повержену, и простре руку свою, и взя ю: и изби ею тысящу мужей. И рече Сампсон: челюстию ослею потребляя потребих их, яко челюстию ослею избих тысящу мужей.

Премудрости Соломони чтение.

Праведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим, аще и муку примут, упование их безсмертия исполнено. И в мале наказани бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их: и яко всеплодие жертвенное прият я. И во время посещения их возсияют, и яко искры по стеблию потекут. Судят языком и обладают людьми, и воцарится Господь в них во веки. Надеющиеся Нань разумеют истину, и вернии в любви пребудут Ему. Яко благодать и милость в преподобных Его, и посещение во избранных Его.

На литии, гл.8:

Не изнемогая, не разжизаяся,
Апостольски, Илие, одолевал еси/
От немощи ти боговместимыя/
Недуги телесныя, духа томление -/
Да ясноявиши образ евангельский//
Крепчайша терпения до конца./

В путных шествиих множицею,
Апостольски, Илие, премогал еси,
Еже во бранех не в меру лишения,
Душею подвизаяся, духом бодрствуя,
Да, яко воинства христианскаго стратиг,//
Образ даси верным мужества край.

Слава, глас тойже:
Ограждая присно богоданный ти народ/
Нецелимую рану сердечную/
Мученически, о Илие, под'ял еси,
До креста смиряся иноческа,
На венец благословенна ко Господу пути,//
Похвалу ти от нас печатлеюща.

И ныне, глас тойже:
Явлением пречудных образов Твоих/
Апостольски, Дево Пречистая, обтекла еси/
Грады и страны христианския,
Ныне же молитвами славна Илии и всех
Печерских отец/
Землю Русскую благословляеши -//
Во Успении не оставльшая мир.

На стиховне:
глас 2, подобен "Доме Евфрафов":

Земле Муромская,/
Образы в веках прославленная/
Святости семьи христианския -/
Славою сияй первоначальною//
Илии, духовна война.

Честна пред Господем/ смерть преподобных Его:
Градов российских матери,/
Божия архистратига доме,/
Веры славь защитника,/
Крепость ти Господню,//
Илию духовна война.

Что воздам Господеви/ о всех, яже воздаде ми:
Соборе богоносных отец,/
Злато Лавры Киево-Печерския,/
Окрест вся осиявающее,/
Возблистай талантом днесь//
Илии духовна война

Слава, глас и подобен тойже:
Новый доме Евфрафов,/
Уделе избранный -/
Русь Святая -/
Храни веру православную,//
В нейже тебе утверждение.

И ныне, гл.8, подобен "О преславнаго чудесе":

О преславнаго чудесе:
Небеси и земли Царица...

Тропарь, глас 4

Новый Сампсон русстей является земли:
От терпения велия стяжевает богоизбрание,
Дерзновением умножает богоданную силу
Сокрушает множицею поганых полки,
Иноческа совершенна венца сподобляется
Илия, Муромская похвала,
Молитвенник о душах наших.

НА УТРЕНИ

По 1-м стихословии седален, глас 6:

Божий трудниче и воине непобедиме Илие,
малодушныя ны воздвигни, заступи немощныя.
Слава и ныне: Заступлением не остави, укрепи
на борющия ны, вся бо возможна Тебе суть,
Мати-Дево.

По 2-м стихословии седален, глас 6:

Несть уныния нам, аще и немощию обложени
есмы, тя имущим, Илие преподобне, заступника.

Слава и ныне:

Несть отчаяния верным, несть одоления от
врагов, Божия Матере покров обретшим.

По полиелее седален, глас 6:

Сердцу Или конечне уранену, паче любовию уязвленну Божию, отлагает стратиг бранныя подвиги, яко князя велика служитель изрядный, избирает, мудре иноческое житие, со святыми упокоение.

Слава и ныне:

Не лиши ны, Матерняго заступления в час суда, милости да не лишимся во веки Божией, со святыми упокоения.

Прокимен, глас 4:

Честна пред Господем/ смерть преподобных Его:
Стих: Что воздам Господеви/ о всех яже воздаде ми

Евангелие от Матфеа, зачало 43

Стихира по Евангелии, глас 6:

Святым, иже суть на Руси Святей, преподобным древним и новым мучеником, удиви Господь хотение Свое, еже Церковь Русскую возродити дерзновенных сих ходатайством:

сего ради, о всей Руси умоляюще, славному духовну воину Илие возопиим:
радуйся, защитнике наш присный и молитвенниче.

Канон, глас 4,
егоже краегранесие:
ИЛИЮ ВОИНА ДУХОВНАГО ЛЮБОВИЮ
ВОСПОИМ

Песнь 1

Ирмос: Моря чермную пучину / невлажными
стопами / древний пешествовав Израиль, /
крестообразными Моисеевыми руками /
Амаликову силу в пустыни победил есть.
Преподобне отче Илие, моли Бога о нас.
Иже вся творяй и претворяяй, Иже тя, Илие,
поборника Си прозорливне избра, да и моей
худости воспети подвиги твоя глагол дарует.
Преподобне отче Илие, моли Бога о нас.
Любезен народу Божию душеполаганием о том
присным явлься, Илие, ныне сердца того
благодарное приими.
Слава: Избрание твое, Илие, от младых ногтей
боговместимую немощию печатлется, да, яко
сам искушен, возможши и искушаемым
помощи.
И ныне: Юже яко Богородицу блажим вернии,
на Сию и упование возлагаем присно, яко
земная Рождеством онебесившую

Песнь 3

Ирмос: Веселится о Тебе Церковь Твоя, Христе,
зовущи: / Ты моя крепость, Господи, / и
прибежище, и утверждение
Преподобне отче Илие, моли Бога о нас.
Верую благодушною яко от руки Спасовы
болезнь приемлет кротостию Илия, сердце
заповедьми Того утверждая присно.
Преподобне отче Илие, моли Бога о нас.
От юности терпение крайнее явил еси, да не от
земных основание подвигом положиши, Илие,
но о Господе Подвигоположнице.
Слава: Иже всякую добродетель яко сродную
Себе зрит, Сей и немощное ти врачует, паче же
преисполняет тя духа силою.
И ныне: Невестная глас Архангелов приемлет
Невеста, паки и утробы възыгание ненеплодныя,
ныне же, яко Мати Царя, к Вифлеему тщится.

Седален, гл.2:

Немощным буди врач, Илие, подвизащимся
наставник, духа бодростию укрепляя вся.
Слава и ныне: Немощным исцеление,
подвизающихся крепость, всем скорбящим
радость познахом Тя, Дево Богородице

Песнь 4

Ирмос: Вознесена Тя видевши Церковь на Кресте, / Солнце Праведное, / ста в чине своем, / достойно взываючи: / слава силе Твоей, Господи

Преподобне отче Илие, моли Бога о нас. Адаманту крепкодушие подобится Илиино, сего ради воинствует той на супостаты изрядне, яко новый Сампсон богозванну народу являет ся. Преподобне отче Илие, моли Бога о нас. Добре сечет иноплеменники ослею челюстию назорей, добре Илия, сему подражая, враги сокрушает яко ратник Христов. Слава: Украшен вельми доблестию, Илие, яко по всяческом во бранех искушен, в супостатех видимых исконнаго врага-человекоубийцу прозираеши, Божиим онаго сокрушая Духом. И ныне: Храмины показываются Вифлеемстии, яко отнюд невместимы Царю всех, в нихже место вертеп Царице, яко красная палата готовится.

Песнь 5

Ирмос: Ты, Господи мой, Свет в мир пришел еси, Свет Святый, обращаий из мрачна неведения, верою воспевающия Тя. Преподобне отче Илие, моли Бога о нас. Огнепаляща пророка имени и благодати наследник быв, Илие, ревностию о народе

Божии сему подобяся, паки и дерзновением на супостаты.

Преподобне отче Илие, моли Бога о нас. Верую огонь с небеси призывая от Господа, закаляет пророк Иезавелины, тако и новый Илия разит поганья, небоязненным духом исполнь. Слава: Не в вихре, не во огни и душе явился пророку Господь, тако и тебе, Илие, яко чистоты рачителю, тонка хлада Иисусова глас открывається, яко иноку совершенну Божию. И ныне: Ахаавово посрамляет безумие пророк, таже дерзость поганых сокрушает воин, да явится молитвенник неусыпающ Приснодевственныя.

Песнь 6

Ирмос: Пожру Ти со гласом хваления, Господи, Церковь вопиет Ти, от бесовския крове очищися, ради милости от ребр Твоих истекшею кровию.

Преподобне отче Илие, моли Бога о нас. Грады могущих покаряются, веси ограждаются русстии, мир вселяется Божий в сердца христиан - тобою, Илие, о хвала Муромская. Преподобне отче Илие, моли Бога о нас. Оглашается воздух похвалами ти сугубыми. Илие, яко стратигу истинну, супостатом еси убо страх, верным же образ к подражанию

известнейший.

Слава: Любвию оскудевши, любвию подвизаемся, Илие, тобою ограждаеми присно от видимых и невидимых враг, по образу твоему дерзающе от земли до небесных достигнути. И ныне: Юница Божия ко яслем тщится, разрешением явити миру спасение: Тельца упитанна, за всех закалаема.

Кондак, глас 6:

Илие терпеливейше, Илие богоизбранне, Илие о небесне воине: огради, защити ны, воздвигни духом, на борющия вооружи.

Икос:

Образу твоему, Илие, прелюбезну дивимся, подвигом твоим вдохновляется и любвию зовем: огради, защити ны, воздвигни духом, на борющия вооружи.

Песнь 7

Ирмос: В печи авраамстии отроцы персидстей, любвию благочестия паче, нежели пламенем, опаляеми, взываху: благословен еси в храме славы Твоя, Господи. Преподобне отче Илие, моли Бога о нас. Бренность жития открывається яве ти, досточудне Илие, раною нецелимою, сердце

Божию любовью уязвляющею.
Преподобне отче Илие, моли Бога о нас.
От славы твоей достождныя, обаче
привременныя, устранися тщишия, да
стяжеш мир паче онаго, о немже воинствовал
еси.

Слава: Всяко спасению устрояющему,
промышляющему премудре о всех, поет новый
Илия-инок: Боже, благословен еси.
И ныне: Идем до Вифлеема, с пастырьми,
братие, да Спасение узрим, да восприимем
небесный мир, иже с Богом Превечным.

Песнь 8

Ирмос: Руце распростер Даниил, львов зияния в
рове затче; огненную же силу угасиша,
добродетелию препоясавшеся, благочестия
рачителю, отроцы взывающе: благословите, вся
дела Господня, Господа.
Преподобне отче Илие, моли Бога о нас.
Юность положивый, Илие, да терпение
стяжеш, зрелостию послужил еси бранным
князю велику подвигом, ныне ко
мироотшествию приближся, мир обрел еси, всяк
ум преимущ.
Преподобне отче Илие, моли Бога о нас.
Во бранех слава твоя, Божий войне, в Книзе
Жизни имя твое, во святых жребий твой, Илие

преподобне.

Благословим: Образ буди нам, святе, терпеливодушия непостыдна, небоязненна духа, паче же смирения, вся от Бога ходатайствующа. И ныне: Смущается Ирод лютостию, затворены дома Богови, паче сердца - поют Христа пастырие и волсви и превозносят во вся веки.

Песнь 9

Ирмос: Камень нерукосечный от несекомья горы Тебе, Дево, краеугольный отсечеса, Христос, совокупивый разстоящаяся естества, тем веселящеса, Тя, Богородице, величаем. Преподобне отче Илие, моли Бога о нас. Помолися о нас, Божий трудниче Илие, да твердостью храним заповеди, да послужим любвию, в Вифлеемских изволившу восклонитися яслех. Преподобне отче Илие, моли Бога о нас. Огради помышления нам, еже суетная презирати, твоим образом вдохновенным, о Илие, и хранимым молитвами. Слава: Илие, крепосте Господня земли Русския, Илие, неусыпный нам страже, возбуди дух нам, еже дерзновением по Господе следовати. И ныне: Мурома прозябение и матери градов украшение, яко райский цвет возносишися

Матери Спаса всех, в Вифлеемских изволившу
восклонитися яслех.

Светилен:

Светла воина и пресветла инока, тьмы борителя
приснаго, воспоим, вернии, Муромца Илию.
Слава и ныне: Свет возсияти мирови, славу в
вышних явити, на земли спасение, Дева
Пречистая в Вифлеем грядет.

На хвалитех, стихиры - 4, глас 5,
подобен: "Радуйся":

Радуйся, Илие, добропобедне стратиже,
Подражавый от Писания Ветха праведником:
Аврааму - верою жертвенною,
Моисею со Навином -
- дерзновенныя души бодростию,
Гедеону же - зрячим Промыслу вседоверием,
Силы богоданныя явлением Сампсону,
Псалмопевцу - веледушием крайним,
Пламенноревностным духом -
- тезоименну ти пророку-девственнику.
Радуйся Илие, благодати наследниче
Мучеников совершенных доблестию:
Иже тя от святых печер
сретоша во обителех небесных:
Зде Димитрий - мироточная града апостольска
глава,

Зде победоносец благороден Георгий,
Стратилаты зде Андрей со Феодором,
С ними Тирон со чотыредесятьми севастиыцы,
Зде же и прелюбезныя со Глебом Борис.

Радуйся Илие, похвала Муромская,
Радуйся, образ многолетна терпения,
Радуйся, непостыдна упования правило,
Радуйся, сосуде силы богоданныя,
Радуйся, разума духовна исполнение,
Радуйся, о людех душу полагавый,
Радуйся, причтенный преподобным отцам,
Радуйся, вселюбезне Илие, Господня крепосте.
Радуйся, воинов Руси первоначальниче,
Радуйся, страже родных ти пределов,
Радуйся, смирителю поганых дерзости,
Радуйся и паки радуйся, имя славное Илие,
Радуйся, полков русских вдохновение,
Радуйся, державы молитвенно ограждение,
Тобою дерзаем и тобою хвалимся,
Убо дерзновение милующее нас
пред Господем яви.

Слава, глас 6:

Отче преподобне Илие, помяни нашу худость, не
престай моляся о любящих тя, паки о воспевших
твой любви ко Господу и народу Его подвиг.

И ныне, глас тойже:

Богородице, Ты еси лоза истинная,
возрастившая нам Плод Живота, Тебе молимся:

молися, Владычице, со святыми Русския земли,
помиловатися душам нашим.

